

दिनांक 01.06.2025

समय: 18.45 बजे

आकाशवाणी जयपुर-अजमेर
प्रादेशिक समाचार

○ प्रधानमंत्री नरेन्द्र मोदी ऊं एशियन डवलपमेंट बैंक रा प्रेसीडेंट मसातो कांडा नुवी दिल्ली मांय मुलाकात करी-एडीबी भारत मांय 86 हजार करोड़ रिप्या रो निवेश करेला।

व गृहमंत्री अमित शाह कयो-सरकार देशभर मांय फोरेंसिक बूता ने मजबूत करण री कोशिश कर री है।

व राज्य मांय पशुपालन ने बधावो देवण सारु हर जिला मांय पशु मेळा लगाया जाएला-पहला चरण मांय दस जिला मांय पशु मेळा भरीजेला।

● राज्य मांय काले ऊं एक र फेरु आथूणी विक्षोभ रे सक्रिय होवण रा आसार- केई जिलां मांय आंधी-बारिश री आस।

000

एशियन डवलपमेंट बैंक-एडीबी भारत मांय 86 हजार करोड़ रिप्या रो निवेश करण री प्रतिबद्धता जताई है। ई रकम ने आवता पांच सालां मांय शहरी आधारभूत सुविधावां रो विकास करण मांय काम मांय ली जाएला। इण मांय पाणी री सप्लाई, स्वच्छता, रहवास अर मैट्रो रेल विस्तार भेळा है। एडीबी रा प्रेसीडेंट मसातो कांडा आज नुवी दिल्ली मांय प्रधानमंत्री नरेन्द्र मोदी ऊं मुलाकात कीनी। प्रधानमंत्री श्री मोदी सोशल मीडिया प्लेटफॉर्म माथे एडीबी अध्यक्ष री पोस्ट ने शेयर करता लिख्यो के मीटिंग मांय केई मुद्दां माथे चर्चा करीजी। लारला दशक मांय भारत मांय व्हीया बदलाव ने अनगिणत लोगां मजबूत बनाया है अर विकास जातरा मांय गति लावण रो काम करयो जावे। वटे ई श्री कांडा आपरी पोस्ट मांय लिख्यो के विकसित भारत 2047 रो विजन महत्वकांक्षी है। एडीबी ई लगस रो समर्थन करे है। वणा लिख्यो के भारत एडीबी रो मजबूत साझेदार है अर एडीबी भारत रा समावेशी विकास मांय मदद करेला।

000

गृहमंत्री अमित शाह कह्यो है कि केंद्र सरकार आपराधिक न्याय प्रणाली मांय फोरेंसिक गवाही वाळा दृष्टिकोण ने प्राथमिकता देवे है। श्री शाह आज कोलकाता मांय नुवा **केंद्रीय फोरेंसिक विज्ञान प्रयोगशाला भवन** रा उद्घाटन जळसा मांय बोल रह्या हा। गृहमंत्री कह्यो के सरकार देश भर मांय फोरेंसिक बूता ने मजबूत करण री कोशिश कर री है। निष्पगस अर सटीक फैसला सारु वैज्ञानिक गवाही री जरूरत ने देखता ओ जरूरी है।

000

तेल कंपनियां आज ऊं 19 किलो वाळा वाणिज्यिक एलपीजी सिलेंडर रा दामां मांय 24 रिप्या री कमी करी है। वठे ई घरू एलपीजी सिलेंडर री कीमत मांय कोई बदलाव नी करी ज्यो है। इण साल अप्रैल मांय घरू एलपीजी सिलेंडर रा दाम मांय 41 रिप्या री कमी करीजी ही।

000

कृषि मंत्री डॉ. किरोड़ी लाल मीणा आज कोटा मांय व्हीया **“युवा कृषक संवाद”** मांय हिस्सो लियो। ई दौरान कृषि मंत्री संभाग रा चारू जिलां ऊं आया काश्तकारां साथे बतळ करी। साथे ई अहलकारां ने वां री समस्यावां ने निपटावण रा निर्देश दिया। कार्यक्रम मांय जयपुर ऊं पूग्या कृषि जाणकारां रो दळ काश्तकारां ने एआई आधारित कृत्रिम वर्षा तकनीक रा बारा मांय बताया। कार्यक्रम मांय प्रगतिशील काश्तकारां अर दूजा फायदो लेवणियां ने सब्सिडी रा चैक दीरी ज्या।

000

21 जून ने मनाया जावण वाळा अंतर्राष्ट्रीय योग दिवस री काउंट डाउन सरू व्हे ग्यी है। इणने देखता आकाशवाणी जयपुर रा क्षेत्रीय समाचार एकांश कानी ऊं संदेश कड़ी सरू करीजी है। इण री मार्फत श्रोतावां ने योग ने जीवनशैली रो हिस्सो बणावण सारू प्रेरित करया जाएला। ई कड़ी मांय आज सुणा जयपुर रा राष्ट्रीय आयुर्वेद संस्थान रा योगाचार्य डॉ. पुनीत चतुर्वेदी रो संदेश।

000

राज्य मांय पशुपालन ने बढ़ावो देवण सारू हर जिला मांय पशु मेळा लगाया जाएला। पशुपालन मंत्री जोराराम कुमावत बतायो के पहला चरण मांय दस जिलां मांय पशु मेळा भरीजेला। और ब्यौरो समाचार कक्ष ऊं म्हारी प्रतिनिधि डॉ. सालेहा गाजी ऊं—

000

सरिस्का अभयारण्य मांय बाघिन—एसटी—19 चार शावकां ने जन्म दियो है। बरेली बाड़ी रा बफर ज़ोन मांय मिली ई कामयाबी रे साथे ही सरिस्का मांय बाघां मांय कुल तादाद बधने अबे 49 व्हे ग्यी है। ओ पहलो मौको है, जद बफर ज़ोन मांय एक ई बगत मांय चार शावकां रो जन्म व्हीयो है। जंगळात महकमा रा मुख्य वन संरक्षक संग्राम सिंह बतायो के कैमरा ट्रैप मांय बाघिन अर उण रा शवकां री तस्वीरां दरज व्ही है, सगळा पूरी तरह स्वस्थ है। वणा लोगां ऊं शावकां री हिफाजत देखता ई हलका मांय नी आवण री अरज करी है। उठी ने वनमंत्री संजय शर्मा ई खुशखबरी ने सोशल मीडिया माथे साझा करता बतायो के एसटी—19 सरिस्का री तीजी बाघिन है, जिण एक साथ चार शावकां ने जन्म दियो है।

000

विश्व पर्यावरण दिवस रे मौके उत्तर—पश्चिम रेलवे कानी ऊं स्वच्छता पखवाडो मनायो जावे। 22 मई ऊं सरू व्हीया ई पखवाडा रे तैत न्यारी—न्यारी गतिविधियां आयोजित करी जावे। ई कड़ी मांय जोधपुर मांय आज प्लास्टिक क्लीनअप ड्राइव व्हीयो अर कपड़ा रा थैला बांटी ज्या, वठै ई अजमेर मांय आज रैली निकाळने प्लास्टिक मुक्ति अर पर्यावरण ने बचावण रो संदेश दीरी ज्यो। और ब्यौरो दे रही हैं म्हाणी खबरनवीस—

प्रदेश मांय ई—वेस्ट डिस्पोज़ल रा बारा मांय जाग जगावण सारू ई—वेस्ट कलेक्शन ड्राइव सरू करी जाएला। राज्य प्रदूषण नियंत्रण मंडल ओ अभियान सगळा संभाग मुख्यालयां अर अलवर अर भिवाड़ी औद्योगिक शहरां मांय चलावेला। अभियान मांय औद्योगिक ईकाइयां ऊं **“डोर स्टैप”** आधार माथे ई—वेस्ट कलेक्शन करयो जाएला। इण रे साथे ई न्यारी न्यारी रेहवासी अर संस्थानां रे कने ई—वेस्ट कलेक्शन सेंटर बणाया जाएला।

000

राज्य मांय काले ऊं फेरु आतूणी विक्षोभ रे सक्रिय होवण रा आसार है। इण ऊं केई जिलां मांय आंधी-बिरखा व्हे सके है। मौसम महकमो इण ने लेर येलो अलर्ट काढ्यो है। वटे ई आज अजमेर, अलवर, दौसा, जयपुर, चूरू, झुंझुनूं अर श्रीगंगानगर समेत 14 जिलां मांय आंधी-बिरखा री गतिविधियां रो येलो अलर्ट है। इण रे साथे ही अलवर, भरतपुर अर हनुमानगढ जिलां सारु ऑरेंज अलर्ट काढी ज्यो है। मौसम केन्द्र जयपुर रा निदेशक राधेश्याम शर्मा बतायो के काले ऊं सरु होवण वाळा नुवा आतूणी विक्षोभ रो असर पांच जून ताई रह सके है।

भीलवाडा अर झालावाड़ मांय तेज गर्मी अर उमस री।

000

आज अंतरराष्ट्रीय बाल रक्षा दिवस है। ओ दिन टाबरां रा हकां अर कल्याण सारु जाग बधावण सारु मनायो जावे। ई मौके मुख्यमंत्री भजनलाल शर्मा कयो के सुरक्षित बचपन ई सशक्त राष्ट्र री नींव है। आपरा सोशल मीडिया संदेश मांय वणा सगळा ऊं टाबरां रा हकां री हिफाजत करण, वां ने बाजिब स्वास्थ्य सेवावां, चोखी शिक्षा अर हिफाजती वातावरण देवण री अरज करी। वणा प्रदेशवासियां, शिक्षकां, पिरवार जनां अर समाज रा हर तबका ऊं बाल संरक्षण रा ई संकल्प मांय सहभागी बणण री अरज करी। ई बीचे, 12 जून ने मनाया जावण वाळा विश्व बालश्रम निषेध दिवस रे मौके काले ऊं जयपुर मांय संवाद कार्यक्रम राख्यो ज्यो है। ओ कार्यक्रम इन्दिरा गांधी पंचायतीराज संस्थान मांय व्हेला। बाल अधिकारिता महकमा रा अतिरिक्त मुख्य सचिव कुलदीप रांका बतायो के इण मांय प्रतिभागियां ने बाल अर किशोर श्रम संशोधित कानूनां री जाणकारी दी जाएला।

000

आज विश्व दुग्ध दिवस है। ओ दिन आजीविका रा खास स्रोत रा रूप मांय दूध रा महतव ने बतावण सारु मनायो जावे। दुनिया मांय हर साल दो फीसदी री दर ऊं दूध उत्पादन मांय बढवार व्हे री है। वटे ई भारत मांय इण री बढवार री रेट पांच दशमलव सात फीसदी है। अबार दुनिया रो एक-चौथाई दूध उत्पादन भारत मांय व्हे रियो है।

000

केन्द्र सरकार 78वां स्वतंत्रता दिवस रे मौके आज ऊं न्यारी-न्यारी होड़ा सरु करी है। नौजवान प्रतिभावां सारु पहली होड रो मुद्दो है- **‘ऑपरेशन सिंदूर – आतंकवाद के खिलाफ भारत की नीति को फिर से परिभाषित करना’**। वटे ई सोशल मीडिया इन्पयूएसर्स ने ई स्वतंत्रता संग्राम ऊं जुड़्या स्मारक अर ठोडां री सैर रा वीडियो बणावण सारु न्यौती ज्यो है। साथे ई **नया भारत सशक्त भारत** थीम माथे पेंटिंग होड़ ई व्ही। सगळी होड़ा रा ठावा तीन जीतण वाळां ने रोकड़ ईनाम दिया जाएला। इण रे अलावा दिल्ली मांय लाल किला माथे स्वतंत्रता दिवस जळसा मांय भेळा होवण रो मौको ई मिलेला। होड मांय हिस्सो लेवण सारु प्रतिभागी 30 जून ताई ऑनलाइन अर्जी दे सके है।

000